



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

PM Modi-i kodanga osangbenertem senden ayonga magi: K Kavitha

Pastor aser kaket zülur Jack W. Hayford alima nungi pilaogo



VOL. XX NO. 89 (ADOK 89)

DIMAPUR

RASEMNÜ (WEDNESDAY)

ANEJETI (JANUARY) 11, 2023

₹ 5.00

DoSE-i sorkar school fee indang nenshir

Dimapur, January 10, 2023 (TYO): Nagaland state nung sorkar school ajak nung June 16, 2022 nü Fee Structure agütsüba ama dang agütsü atema Directorate of School Education (DoSE)-i nenshia metetdaksüogo.

sorkar school tem (GHSS/GHS/GMS/GPS) nung tekolakpur ajak dangi shidi ka yokogo.

RTE Act, 2009 nung aliba ama Class VIII tashi NBSE nem agütsüba fee dak alaka Admission Fee aser Exam fee kecha magütsü atema DoSE-isa nenshia metetdaksü.

DoSE-i January 10, 2023 nü

Kin hoho 15-i election matongdang Naga yimten latettsü mepishir

Dimapur, January 10, 2023 (Agencies): Nagaland nung kin hoho 15-i India sorkar dang assembly elections matongdang Naga yimten latettsü atema temepishiba ka agütsüogo.

India sorkari joko memenui iba onük süoki ia bilemsüla aser election matongdang yimten latettsüla, ta parnokisa ashi,

Parnoki iba onük atema Naga olemtep nung interlocutor ajak den ajurutepegogo aser ano July 24, 2021 nü Prime Minister Narendra Modi dangi shidi ka züluogo ta metetdaksü.

August 31, 2019 nü Dimapur nung Eastern Naga People's Organisation (ENPO) kübok kin 6 aser Nagaland nung kin 8 ajurutepe senden amendang India sorkar aser Naga yimten telok balala tsüngda yimten latettsü atema jembiba pusema nungütsü bangjemtepegogo ta Nagaland nung kin hoho 15-isa ashi.

Centre-i o tajung mesüra yimymtem ajanga tai maketba Naga nung mashioktsütsüla ta parnoki sangdong ka nung ashi.

Nagaland nung 2018 assembly election magidang Naga nungeri 'election masü yimten latettsü' aginü saka BJP sorkari 'yimten latettsü atema election' ta nangzükba ajanga Naga nung mesüzük aser tang iba yimymji ashioktsüba aser temulung malemba ka kumogo, ta kin hoho 15-i ashi.

Impur constituency menden tazüing kumogo

Dimapur, January 10, 2023 (TYO): 23-Impur assembly constituency nungi MLA Dr Imtiwapang Aier January 7 nü ajungbena asüba ajanga iba menden tazüing kumogo ta Nagaland Legislative

Assembly Secretariat-i tanü metetdaksü.

January 8, 2023 nungi 23-Impur (ST) Assembly Constituency menden tazüing kumogo ta Assembly Secretariat-i sangdong ka nung ashi.

BRS-i Karnataka aser Nagaland nung nübo ayimtsü

Hyderabad, January 10, 2023 (Agencies): Taküm May aser February nung Karnataka aser Nagaland nung Assembly elections agütsü atema Bharat Rashtra Samithi (BRS)-i nüboyimtsü sentong renemogo.

toktepnür.

Nagaland nunga BRS lennirtemi Nationalist Congress Party (NCP) aser aluyimer lennirtem den assembly menden kar nung tokteptsü atema jembiteper.

Assembly election agütsü aliba state ana nung BRS-i H.D. Kumaraswamy-i aniba Janata Dal (Secular) aser Sharad Pawar-i aniba Nationalist Congress Party (NCP) atema minister aser MLA tem nüboyimdaksütsü sentong lir.

BRS-i Nagaland nung Rythu Bandhu, Rythu Badhu aser power angati agütsütsü nangzükba aluyimertem mesüzüksü meranger. Nagaland nung voters lakh 12 tema lir aser iba nungi lakh 4.5 shi aluyimertem ta amanger.

Election Commission-i osang sangoktsüba sülen Chief Minister K. Chandrashekar Rao-i Karnataka nung nüboyimtsü imlar.

Sharad Pawar'er Nationalist Congress Party (NCP)-i Nagaland Assembly elections nung tokteptsü atema külem tangatetba aliba teloktem bushir.

BRS-i Karnataka nung JD(S) atema nüboyimtsütsü aser Kalyana Karnataka tesem nung constituency kar nungi tokeptsü tebilemba lir. Iba tesem nung Telugu oshi jembir aika lir aser iba jagi JD(S) teyari agia BRS-i

Nagaland nung NCP lennir aser taoba MLA Y. Sulanthung H Lotha-i Honibarnü social welfare minister Koppula Eshwar den ajurutepe aser Nagaland nung BRS den külemi inyaksü ashi.

Election Commission of India-i Nagaland semdangtsü NLA elections atema CAPF company 50 yokogo



Chief Electoral Officer (CEO) Nagaland V Shashank Shekhar-i pa indang office nung Nagaland nung political party lennirtem den senden ka amenba angur.

Dimapur, January 10, 2023 (TYO): Züngsem 16 agi akümba Election Commission of India (ECI) telok kati January 13 nungi 15, 2023 tashi Nagaland semdangtsü.

teshimtet nübotem den ajurutepe senden ka menogo.

ECI teloki Nagaland DGP, Chief secretary aser ano tongti ketdangsurtem den ajuruteptsü ta Shashank-isa ashi.

Iba mapang ECI teloki deputy commissioner, superintendent of police, State & Central enforcement agencies aser recognized political party ajak den ajuruteptsü.

ECI-i election duty atema Central Armed Police Forces (CAPF) company 50 yokogo aser ano company talila arudar ta paisa ashi.

ECI-i Nagaland semdangi marudang Hombarnü Chief Electoral Officer (CEO) Nagaland V Shashank Shekhar-i political party balala nungi

Nagaland sorkari CAPF indang company 30 meshi saka ECI-i election duty atema company 50 yokogo ta osang angazüker.

Tesüiba ita ana tashi assembly

election atema state-level training aser tanga maparen renema arur, ta Nagaland CEO-isa metetdaksü.

Paisa political party tem aser sendaktepa alirtem dang election mapang osang belenshiba nung kanga kümdangtsü kechiyong osang tai aser olulutem prokshitsü akok ta kümdangtsü shiogo.

Nagaland nung election tiptema agitettsü atema senso ajaki government, central aser state enforcement agencies nem osang sagoktsütsü imlar aser nisung ajaki polling nung shilem agütsü ayongzükur ta Shashank Shekhar-isa metetdaksü.

LKM küm 75 ajungba Washimung Yati sentong agiogo



PWD (Housing & Mechanical) Minister Tongpang Ozüküm-i LKM Washimung nüngo kaket sayatsüba angur.

Chuchuyimlang, January 10, 2023 (TYO): Langpangkong Kaketshir Mungdang (LKM) tenzükur küm 75 ajungba Washimung sentong Jan 9 aonung nungi tenzükba Chuchuyimlang yimdak LKM kübok unit 19 nungi tejaoker 1500 shi adenshia kanga longsoa mungdaki.

akangshitsüla ta Tongpang-isa mungdangsanger ajungshi.

"LKM kübok samanir ana- L. Pangersowa Jamir aser L.L Yaden nüngtem award/scholarship tajung tenzükba lir, R.C Chiten nüngtem nung school tenüing jatetja lir, yamaji ano maneni samanir balala nem tetushi agütsütsüla" ta paisa tebilemba ka lemsatop.

Tanü Washimung Yati sentong nung akhümdong PWD (Housing & Mechanical) Minister Tongpang Ozüküm liasü.

Alima ainba nung rongsenketzung ya kanga tongtibang, anungji tanü putu sorkar mapa nung masü saka business balala inyakba nung ajungshitsüla. Business balala inyaksü asoshi sen nüngdaker, anungji bank aser senotsü aputsüba teloki temulung lemtettsüsa ochishia meranga inyaksü ayongzükur ta Minister Tongpang-isa metetdaksü.

"Jubilee ya pelatepa amungba benjong ka dang masü saka ibai tesüiba anogotem meyipa repringshiba den tarutsü asoshi bilema amungba mapang ka lir, ibai taitoktepe aser putepshiba mapang ka lir" ta Minister Tongpang-i o jembidang ashi.

Tanü iba sentong nung nisung asem nem L. Pangersowa Jamir Trust Award for Academic Excellence agütsü. Parnokji Changtongya tsür Kr. Otikala Jamir (Tebu Tenüing - Sowa Jamir), Changtongya tsür Kr. Yimyatetla Longkumer (T/Tenüing - B. Tiameren), Merangkong nung

Jubilee mesüra mungdang aika nung bangzüng balala renemer, saka renema ama asenoki aika mapa kuma meinyakteter.

Anungji, bangzüng kechisa renemdir itemji mapa kuma inyaksüla, ta paisa ayongzük.

Kishikina Chang aser Phom nung den taoba mapang koda putepe aru, yamaji telungiem tali

Sb. Toshimanen Jamir (T/tenüing - I. Korachiba Jamir). Iba konang senpet ya Class 10 (HLSC) taidang nung tangar dang alakteta takok angur nem kuli kaket den sen 20,000/- dena agütsür.

Iba den ano L.L Yaden Meritorious Scholarship par asemi agizük- Changtongya tsür Kr. Aküminla (Tebu tenüing - Takosangba), Chuchuyimlang tsür Kr. Yongkongsangla (T/tenüing - Lanulepden), Mongsenyimti nung Sb. Marnungtet (T/tenüing - Imoliba). Iba scholarship ya Langpangkong litsü kübok Govt. School nung azünger Langpangkong nung marks tematiba nguteter nem kuli kaket den sen 50,000/- agütsür.

Tanü Yati sentong nung Phom Students' Conference tir N. Dape Phom, Ao Kaketshir Mungdang tir Nungdokyanger Ao, Ongpangkong Kaketshir Mungdang tir Limatongzük Jamir, Langpangkong Tzükong Mungdang tir Marsanen Imsong nungeri o jembir.

Maneni, LKM Shisa Teyur & Director, LSD, Nagaland, Kohima A Pangjung Jamir, Dept of Law & Justice, GoN, Consultant A. Chuba Ozüküm, L. Pangersowa Jamir Trust Award for Academic Excellence aser L.L Yaden Meritorious Scholarship Convenor P. Onen Longkumer, mezüng LKM tir asür L.L Yaden'er kinunger tenüing nung par tanük Putimeren Imsong, LKM Washimung otsü zülur luden convenor Imotong nungeri shilem balala agi.

Kangtsüing kaketshir Telongiem aser jubilee choir-i ken tajung kaka tena jubilee mungger saksalemdaksü.

Mupongchuket yimtak AKTM 43 Buba Lokti Senden kadagi



Mupongchuket yimtak January 10 aonung nungi tenzüka Asetkong Kaketshir Telungjem Mungdang 43 Buba Lokti Senden nung ABAM Executive Secretary Rev. Dr. Mar Pongener-i tongti o jembiba aser lokti sentepa aliba noksa nung angur.

Mokokchung, Aenjeti/January 09(TYO)

Mupongchuket yimtak January 10 aonung nungi tenzüka Asetkong Kaketshir Telungjem Mungdang 43 Buba Lokti Senden "Sobaliba Nükmen Lokmedem" ta asüba omen nung ajemdaker Kaketshir telen 8 nungi kaketshir nübu 365 adenshia kadagi.

Iba lokti senden ya January 12 nü tashi akatsü aser taonung Superintendenting Engineer Dept. of Power Govt. of Nagaland Er.R.Lobosang Jamir-i iba mungdang lapoktsüogo.

Taonung iba mungdang lapoktsür kelen Er.R.Lobosang Jamir-i jembidang Asetkong lima Impur nung Dr.E.W.Clark-i mission Center lapok, iba temoatsüji asen Asetkong tsükong nungi asen Naga lima nung mezüngbuba Chief

Minister P.Shilu Ao-i anir mayangsür(Pioneer) aika adokogo. Saka tanu Asetkong tia kechi nung lir? Iba jenjangji Asetkong-sanger talisa kaketshirtemi khen aroka shisadangtsü kanga dang nungtakerta mungdangsanger kaketshirtem ayongzük.

Er.R.Lobosang-isa asen tsüraburtemi kanga dang meranga inyak, parnoki arem chiteta alu yima yangji yateta asenok peria chia jemdaksü. Mapa meranga inyaksüji asen tsüraburtem tangatetba asü, iba jagi parnoki inyakbanung Tsüngrem temoatsü aden, yamaji kaketshirtemi alu meyimtetsü asünung kaketshirtemi shisaliok lu nung meranga inyaka takok ngutetsü nungtakerta adenshia aliba kaketshirtem ajungshia ashi.

Alima nung alir meimchirtemi

inyaktsü mapa jenti lir,Sorkar mapa dak dang metaloker aliba tangatetba toktsüsüla,lanurtemi meranga inyaka pei sasa noktaktetsülata paisa shisem.

Iba sentong lapokba Mupongchuket Ait Laishir Telungjemi agi, sentong nung Tsüngrem taochi jazüka Chami Baptist Arogo Pastor Alem Aier-i ABAM Executive Secretary Rev.Dr.Mar Pongener ajanga tongti o jembiba, tarur pela agizükba o Mupongchuket Village Council Chairman Wb.Arentemsü-i jembiba, metetpelaba mapang AKTM metetpela zülur Lanuyanger ajanga agi, Kr,Arenchenla Walling-I ken tajung ka tena telok ayongzük. Sentong nungsa Jeptak jembiba liasü aser iba sentong Supongasng Jamir lenisüba nung agia liasü.

Advisor Imnatiba-i ITI, Longleng semzüksü

Dimapur, Aenjeti/January 10 (TYO): MLA & Advisor, Industries & Commerce and Labour & Employment, Skill Development & Entrepreneurship, Nagaland, Imnatiba-i, January 9 nü Pongo nung Industrial Training Institute (ITI), Longleng semzüksüogo. Iba sentong nung Minister for Health & Family Welfare, S. Pangnyu Phom aser Deputy Commissioner, Longleng, Dharam Raj natia shilem agia liasü.

Sentepa aliba lokti den o jembiba mapang Imnatiba-i, 2004 küm Longleng ya district headquarter küma ajungketba sülen Phom nunger aser Longleng nung aliba nüburtem atema district ya lenla ajak nung renloka odar ta ashi.

ITI institution koda tongtibang iba indang jembiba mapang pai, iba ajanga government mapa mesüra tanga dak memetaloki alitsü atema asoshi skills, training aser certificates agütsür, ta ashi. Imnatiba-i ashiba agi, taoba mapang sorkar mapa ya quality education aser skill development makai certificate dak dang ajemdaker agütsüogo. Ajisiaka tangbo alima kanga melenshiatokogo aser quality skill aser technical knowledge melira public aser private sector naprongla nung mapa asoshi maongka mangutsü. Paisa, taoba mapang ama tangbo MLA aser Minister temi skill development medeni certificate

dak dang ajemdaker mapa magütsüetetsü, ta ashi.

Imnatiba-i, lenirtem dang ITI institution ya koda tongtibang iba indang nüburtem nem tangazükba agütsütsü ajungshi, ajita asünungdang kaketshirtemi tanü asüng lima nung kechi ataloker aji jangjatsü aser training agiba mapang parnok sempet arangtetsütsü atema bendanga agüja inyaksü, ta ashi. Pai, nüburtem dang sorkar scheme aser itasen dak dang metaloker malitsü saka rongsenketzüng jenjang ajungkettsü atema ali rongsen aser ali temo amshia shishilemba balala tenzütsü ajungshi.

Kasa mapang nung S. Pangnyu Phom-i, Pongo kübok amenokba ITI institute ya Longleng nung aliba nüburtem ajak atema lir aser Pongo yimtsüngi iba ya anepalutsü ta ashi. Iba dak ajemdaker pai Pongo Village Council aser ali kiburtem dang Phom nunger ajak atema ITI indang khuret ya parnoki abentsü ayongzük.

Pangnyu-i ashiba agi, ITI ajanga mapa balala asoshi certificate den training skill tem agütsütsü aser sensaker, school mezüngteti anenertem shirnok tangaleni oa mezüngteter parnok career yanglutsü atema maongka agütsütsü. Paisa, sentepa aliba lokti dang sorkari agütsüba maongka ya nüburtem terenlok asoshi amshitsü ajungshi.

Sentong nungsa o tatsüka jembiba mapang Deputy

Commissioner, Longleng, Dharam Raj IAS-i, Naga nungertem tasodang nungi sempet tajung keter aser aser technical skill tem atema training shidak agitsü asoshi maongka dang agütsüra mapa inyaksü atema maongka aika angutsü ta ashi.

Maneni Deputy Director, ITI Kohima Er. H. Alongse-i, project indang metetdaksü aser ashiba agi, ITI Longleng ya sen crore 6 intoka yanglutsü asatet kong machineries aser equipment tem alitsü atema sen lakh 20 benokba densema mali, koba tanabuba shilem nung intoktsü ta ashi. Paisa, ali kiburtem aser Pongo Village Council dang lenla ajak nung institution renloka aotsü atema department den tesendaktep tajung ayutsü mepeshi. Alongse-isa, Longleng, Kiphire, Peren aser Dimapur ITI tem nung mapa adokdaksütsü atema department-i inyakdar ta ashi. ITI Longleng ya 2023 küm July aser August ita nungi inyaksangshi tenzütsü, ta pai ashi.

Sentong nung Pastor, Pongo Baptist Church (PBC) Metlau Phom-i iba institute meshiteta sarasadentsü, Chairman, Pongo Village Council-i lokti pela agizükba ojembiba aser Youth Pastor, PBC Akong-i ken ka aten. Iba sentong ya mendenbuba Principal Government ITI, Mokokchung Er. Imlisunep-i anküp o jembiba sülen tembanga liasü.

Tening Namsan yimtsüng semzüksüogo

Dimapur, Aenjeti/January 10 (TYO): Tawa agizükba Tening Namsan village semzüksüba sentong January 9 nü agiogo. Iba sentong nung Advisor for Water Resources, Namri Nchang alaketa jaoker liasü.

Yimtsüng semzüksüba sentong nung o tatsüka jembiba mapang Namri-i, yimtsüng nung tintetrogotem aser Tening Namsan council züngsemtem dang tarutsü nung terelok maparen tali benoka inyaksangshitsü atema Administration aser tanga sorkar telentem den teka amteper inyaksü ajungshi. Paisa, Tening Namsan yimtsüng nung aliba nüburtemi mapang talang ka nungi yongya ataba nükjidong ataloktsüba atema Chief Minister-i anir Nagaland sorkar dang kanga pelaba

lemsatsep. Maneni pai yimtsüng nung aliba nüburtem dang yimjung nung alitsü ayongzük.

Sentong tetenzüki Advisor-i nungshilong sayatsü aser iba sülen sobaliba sentong ka agia liasü.

Yimtsüng semzüksüba sentong nung Ex-Chairman, TVC, Namkiabui, Secretary, Tening Namsan, Kainia, EAC, Nsong, Yimkum I. Ozukum aser Superintendenting Engineer (Agri), Er. Achakbo Newmai nungeria o tatsütsü jembiba liasü.

Sentong nungsa THYO-i sobaliba tsüngsang ka saya aser Winangthone-ia shilem agia liasü. Iba sentong ya Chairman Tening Namsan, Ramga lenisüba nung agi aser Chairman, Tening Village Council, Pelenkeng-i tepela anküp o jembiba liasü.

Yimkhiung Akheru Arihako General Conference tenzüko



Dimapur, Aenjeti/January 10 (TYO): 57buba Yimkhiung Akheru Arihako (YAA) General Conference Pungro, Kiphire nung January 10 nü tenzüko. Iba sentong ya "Breaking through to excellence: Facing the Yimkhiung Future Together" omen nung ajemdaker January 10 nungi 12 tashi agitsü.

General Conference lapokba sentong nung Advisor to Chief Minister & Secretary General, NDPP, Abu Metha alaketa jaoker liasü aser Advisor, IPR & Village Guards, S. Keoshu Yimkhiung tetushi tejaoker liasü.

57buba Yimkhiung Akheru Arihako (YAA) nungdem nung metai nungshilong ka sayaja liasü.

Mokokchung DC-i CMHIS indang metetdaksü

Dimapur, Aenjeti/January 10 (TYO): Taoba mapang sangdonger aliba nung temelenshi tera bener aruja Mokokchung Deputy Commissioner Sashank Pratap Singh, IAS-i sangdong ka ajanga Chief Minister's Health Insurance Scheme (CMHIS) atema special enrolment drive sentong ka teküboklen agüja aliba tesemtem nung January 11 nungi 18 tashi agitsü ta metetdaksüogo.

CMHIS special enrolment drive sentong ya Dibua, Khensa, Longsa Chungtia, Aliba nung January 11 nü agitsü; Warumong, Changtongya Town, Changtongya Village, Akhoya, Chuchuyimlang nung January 12; Molungkimong, Nukshiyim, Liro Model village, Kelingmen, Yaongyimsen nung January 13; Mongchen, Longjang, Khanimo, Longpa, Mopungchuket nung January 14; Yimchenkimong, Lirmen, Yajang A, Aonukpu, Lakhuni nung January 16; Changki, Merangkong, Unger, Sungratsu, Kupza nung January 17 aser Tuli Town, Wamaken, Anaki, Asangma nung January 18 nü agitsü.

Iba sentong ayongzükba agiba mapang tinyaktsütem yamai alitsü:

- Administrative Officers temi camp atema maparen balala achaayangtsü asoshi supervisor/operator aser Village Council/Ward Authorities tem den tongtepratepa inyaksangshitsü.
- Administrative Officer ajaki camp mapang shidak nung tenzütsü asoshi achaayangtsüla aser parnoki achaayanga agiba camp tem indang osang anogoshia Deputy Commissioner nem agütsütsüla.
- Operator temi camp kecha tetsükdaksü makai agitetsü atema Administrative Officer tem den tongtepratepa inyaksü nungdaker, shirnok tawabanga kübok yimtsüngtem lir.
- Village Councils aser Ward Authorities tem dang pei yimtsüng/kiyong nung enrolment drive agitsü atema ki renemtsütsü aser nüburtem nem camp indang osang agütsütsü metetdaksüogo.



January 10, 2023 nü BJP headquarters, New Delhi nung BJP National Tir, J.P. Nadda leniba nung party General Secretaries senden amenba noksa nung angur.

PM Modi-i kodanga osangbenertem senden ayonga magi: K Kavitha

New Delhi, January 10 (Agencies): Telangana nung ruling Bharat Rashtira Samithi (BRS) MLC, K Kavitha-i, tesüiba küm 9 tsünga Ato kilonser, Narendra Modi-i osangbenertem senden ka danga ayongzüka magi, ta metetdaksü.

Amongnü Patancheru nung Telangana Union of Working Journalists senden nung jembidang Telangana Chief Minister, K Chandrasekhar Rao'er jala, Kavitha-i, tang tashi nung Ato kilonser, Narendra Modi-indangindanga osangbenertem den mejembi, saka teshimtet interview nung dang shilem agi, ta metetdaksü.

"Tesüiba küm 9 tsünga Ato kilonseri osangbenertem senden nung khen danga mejembibaji asenok atema tia maka. Tang

tashi nung osangbener shingaia pa dang tasüngdangba ka danga masüngdang, kechiyong pai (Modi) teshimtet kar atema dang interview nung shilem agi. Ajisüaka yangibo (Telangana) asen Chief Minister-i osangbener 300 nungi 350 tashi den jembir aser osangbenertemi asüngdangbatem atema telangzüba agütsür," ta lai ashi. Lenir kaji teladak asütsüla aser khuret abener ka asütsüla, ta shia Kavitha-i, Ato kilonser ya 'Meet the Press'-i jaoktsüla, ta ashi.

Osangbenertem dang lai, "Onok nenok den lir anungji asenoki pa (Modi) dang t a s ü n g d a n g b a t e m asüngdangtsüla aser repringdangdi," ta ayongzüka.

Taoba mapang Nizamabad nungi MP, Kavitha-isa, "Kodang

lenirtemi tasüngdangbatem asüngdangdir ibaji yimtenren ama züngshir. Ajisüaka nenok o s a n g b e n e r t e m i tasüngdangbatem asüngdangra ibajibo junga agizüktsü aser ibaji ajanga nüburtem ajangzüktsü," ta ashi.

Laisa Modi dang, Telangana sorkari osangbenertem nem teyari agütsüba ama Centre sorkaria teyari agütsütsüla, ta takhangba agütsü.

Kavitha-i, Telangana sorkari osangbenertem atema sen crore 100 lemzüktsü saka Centre sorkari osangbenertem atema mebilemstür, ta ashi.

Iba senden nungji Telangana Minister V Srinivas Goud, MLA Kranti Kiran, Media Academy Chairman, Allam Narayana aser state balala nungi tejaokertem aika aden.

Election agitsü atema onoki memepishitsü: Omar Abdullah

Srinagar, January 10 (Agencies): National Conference (NC) tatong Tir, Omar Abdullah-i, election ji Kashmir nung temeden lir, ajisüaka onoki Jammu & Kashmir nung election agitsü atema Centre dang meshimetsü masütsü, ta metetdaksü.

Mongolbarnü Anantnag district nung osangbenertem dang jembidang Omar-i, "Taküm elections magiyonga kecha masü! Onok meshimetsürtem masü. Kashmir nung ya meshimetsürtem masü, ta ni aiben jembia aruogo. Election ya onok temeden saka onoki iba temeden atema parnok (Centre) dang meshimetsü masütsü. Parnoki election ayongzükra tajung asütsü, saka mayongzükyonga kecha masü," ta metetdaksü.

Kiojen aser state meyong li nungi nüburtem aienshidaksüba dak sendakba nung tasüngdangba ka langzüdang taoba mapang chief minister, Omar-i, Jammu & Kashmir nung election mayongzükra kulitem rongnung ibaji densema lir, ta metetdaksü.

"Ibayongji parnoki (Centre) election ayongzüka magir. Parnoki nüburtem amokmerener. Nüburtem zübo aneptsütsü atema inyaksü melen parnoki ano taliba yirutsüner ama repringteter," ta pai ashi.

Nüburtemi shimtetba nüburtemi nübur zübo aneptsütsü atema merangtsü, ta meteta BJP sorkari zübo nung metzü inoktsütsü meranger, ta pai ashi.

Rajouri nung kiralongrartemi amakba sülen sorkari village

defence guards nem raraba hadir agütsütsü teletmetba agiba dak sendakba nung Omar-i, iba ya Arlla 370 agienyonga tamakok anguba kuli lir, ta metetdaksü.

"August 5, 2019 nü linük nüburtem dang, Kashmir nung rara ya Arlla 370 ajanga lir aser Arlla 370 agienba ajanga raraba sobaliba anentsü ta ashi. Ajisüaka iba amaji masü ta jangjaogo. Tang Rajouri amakba aser Kashmir tensa majungba nung ajemdaker security sepaitem teimba lemzüktsüogo. Item ajungaji ajanga tensa maziüoktetba kuli sayur, ibaji ajanga sorkari item teletmetba agia inyaker," ta paisa shisem.

January 1, 2023 nü kiralongrartemi Rajouri district kübok Dhangri yim amakba mapang civilian tenet asü aser 14 yirua liasü.

UNSC nung menden bendenlokra India-i permanent seat angutsü

New Delhi, Aenjeti/January 10 (Agencies): Taruba küm ter tsünga United Nations Security Council (UNSC) nung menden ano tali bendenlokra UNSC nung India Permanent züngsem akümtsü, ta mongintemi metetdaksü.

Think-tank Atlantic Council-i agiba survey ajanga ashiba agi, UNSC nung menden tali bendenlokra India-i iba maongka angutsü.

Züngsem linük 15 aliba UNSC nung permanent züngsem pongu lir aser US, UK, France den Russia linüktemibo India nem permanent seat agütsütsüla, ta pusemer.

UNSC nung India permanent züngsem akümtsü atema China-i dang India pumasemer.

Japan, Brazil, Nigeria mesüra South Africa-ia UNSC

nung menden angutsü ta asadangteter aser parnok tesadangibo India-i permanent seat angutsü, ta ashir.

India-i UNSC nung permanent seat angutsüsa maongka shilem 26 lir; Japan-i menden angutsüsa maongka shilem 11 aser Brazil-i iba menden angutsüsa maongka shilem 9 lir, ta Atlantic Council survey ajangasa metetdaksü. Ajisüaka iba survey nung shilem agir shilem 64-ibo 2033 küm tashi nung UNSC nung menden tali mebendenloktsü, ta bilemer.

India UNSC nung küm ana non-permanent züngsem liasü saka kümsük yaküm tembangogo.

India External affairs minister, S Jaishankar-i 2028-29 kümsük nunga India non-permanent züngsem candidate asütsü, ta sangdongogo.



January 10, 2023 nü Agniveers mezüngbuba batch pur Artillery Centre, Hyderabad nung training tenzükba noksa nung angur. Linük nung Agniveers 40,000 shimogo aser iba nungjagi parnok 5,500 Hyderabad nung aliba Artillery Centre nung training tenzükogo.

Uttarakhand sorkari assessment committee tentettsü tuyuogo

Dehradun, January 10 (Agencies): Mongolbarnü Uttarakhand Chief Secretary, SS Sandhu-i ketdangsertem dang Joshimath nung ali anenoka aiba aser kiojen kaksaba kuli bushisüngdangtsü atema assessment committee ka tenetdang, aser iba committee nungji Joshimath jila nung alirtema kar züngokang, ta tuyuogo.

Sandhu-i sa ketdangsertem dang, team ka anogo shia Joshimath tesem balalai yoktsüla aser jila nung teraksatsüba balala jungjunga asadangtsüla, ta tuyuogo.

Mongolbarnü state secretariat nung Joshimath tensa atema senden ka amenba mapang nung Chief secretary-isa item tetuyuba agütsü.

Chief secretary-i, nüburtem kümzüktsü aser kiojen kümzüktsü atema kibongtem aienshidaksütsüla aser kaksaa aliba kiojentem tekaraba nung bendoktsüla, ta tuyu.

Paisa, "Kiojentem bendokba mapang mongintem teyari agitsüla. Iba denji külemi 24x7 control room lapoka rongdak

o s a n g t s ü s a n g tongteprateptsüla," ta metetdaksü.

Mongolbarnü state sorkari ashiba agi, Joshimath nung ki 723 kaksago aser item rongnung ki 86 bo nisung alitsü mejungi kümogo.

Joshimath nung ali anenoka aiba aser kiojen kaksaba dak sendakba nung Uttarakhand sorkari National Remote Sensing Centre (NRSC), Hyderabad aser Indian Institute of Remote Sensing (IIRS), Dehradun dang satellite noksatem ajanga Joshimath survey agia bushisüngdangba sülen noksa den külemi report tejangja agütsüdsüner, ta mepishiogo.

State nung high-level coordination committee ka tentettsü aser Joshimath nung anentsüh agi kongshiba tesemtem nung terenlok mapatem inyaksü.

Iba committee nung tongtiji Additional Chief Secretary, Radha Raturi lir aser local area committee nung tongtiji Commissioner (Garhwal) Sushil Kumar lir.



January 10, 2022 nü Kanpur nung aliba LPS Institute of Cardiology & Cardiac Surgery nung shirangertem amongba noksa nung angur. Tan hopta kija nung Kanpur nung nisung 98 temelungjang tashidak agi süogo.



TIR YIMYIM

YIMOBILEM (EDITORIAL)

DIMAPUR RASEMNÜ, AENJETI (JANUARY) 11, 2023

Nagaland nung komala election ka agitsü?

- P Tiamongba Aier

Taoba mapangbo Nagaland nung assembly election agitsü anogo matongdang ita ana-aseem jelia nungi party balalai ototia election maparen tenzüka inyak aser külen state sorkari yimjak nung election asoshi renemshiba maparen tenzüka inyakasa aru. Ajisüaka state sorkar kümsük tembangtsü ita ana shi dang anünga liaka election maparen balaka inyakba majiteteter. Iba jagi Nagaland nung Naga yimten latettsü ola den ano Frontier Nagaland state akümtsü takhangba ajanga election ya magii thinentüsü asü? President's Rule ang arutsü asü? ta nübertem ratatepa arur. Nagaland nung political party tem nungi osang kecha maliba den ano Election Commission of India (ECI)-ia election agitsü indang kecha balaka mashiba ajanga nübertem terata ka nung lir. Karnataka state sorkar kümsük May 24, 2023 nung ang tembangtsü saka December 9, 2022 nü ECI-i 2023 Karnataka Assembly election atema telatetba kar metetdaksüogo. Süra, Nagaland state sorkar kümsükji Karnataka dang tama March 2023 nung tembangtsü lir saka tanü tashi ECI nungi tetuyuba mesüra osang kecha mali. Election agitsü asü magitsü ta terata ka nung 2022 küm tembang aser kasa terata nung küm tasen nung ayaoka aيتدang January 6, 2023 nü Doyang ayong anasa Wokha-Mokokchung lenmang nung election duty atema aruba Border Security Force (BSF) sepaitem amenba gari ka tsükokba ajanga election ya agiküm ta bilem. State sorkar, political party mesüra ECI nungi osang balaka mangashiaka Centre-i miim sentong ka renemer election agitsü atema renemer asü ta BSF sepaitem indang gari tsükokba ajanga tebilemba ka aru. Ano külen, Nagaland nung Chief Electoral Officer (CEO) ajanga Nagaland sorkari election atema Central Armed Police Force (CAPF) company 30 meshi saka Centre-i election duty atema company 50 yokogo aser ano company talila yokdar ta ashiba osang angashiogo. Süra, taküm Nagaland Legislative Assembly election ya koma ka agitsüba ta kanga ratar. Election Commission of India (ECI) teshimtet telok ka January 13 nungi 15, 2023 tashi Nagaland-i arur election dak sendakba maparen reprangshimtsü ta Nagaland CEO-isa metetdaksüogo, saka tanü tashi Nagaland nung political party tem mesüra state sorkar nungi election indang olen kecha balaka mejembir. Taoba hopta Union Home Minister Amit Shah-i Nagaland semdangi arutsü ta osang sangoktsüba sülen nisung aikati Amit Shah ajanga Naga yimten tebilemstsü indang langkabo ashitsü akok ta imlaseta ataogo, saka pai iba indang olen kecha mejembii dang meyipa ao. Ano, assembly election matongdang Prime Minister Narendra Modi-i tan ita Nagaland semdangtsü ta angashia, Amit-i masü Modi-i ang Naga yimten latetba osang metetdaksütsü asü ta bilema lia, ECI telok ang ka arutsü angashir. Centre sorkari Naga yimten latettsü nung tetsükdaksü ajuruba aser ano Eastern Naga nungeri akhangba Frontier Nagaland state akümtsü tasak asüba agi tashiyim agi NLA election agitsü sentong atonga inyaker asü ta tsübua bilemer. Nagaland sorkari election atema CAPF company 30 dang meshi saka Centre-i 50 yokogo aser ano company talila yoksemtsü ta asübaji Centre-i CAPF tashi amshia Nagaland nung election agitsü sentong atonger asü? Mesüra Centre sorkari Naga yimten jia latettsütsü, Frontier Nagaland state jia kümtsütsü aser election-a agitsü ta terenemba ka lir? August 2019 nung Centre-i Indian Constitution nung Jammu and Kashmir indang Arrla 370 agienba ama Nagaland indang Arrla 371A agiener Union Territory ka kümdaksütsü aser tashiyim agi election agitsü atonger asü? Iba atema Naga nungertemi kanga süoki ia bilemstsüla aser külem ola ka adoktsüla ta bilemer. 2018 Nagaland Assembly Elections magidang BJP-i 'Yimten latettsü atema election' ta yimyim ayimoktsür election agiogo, anungji iba yimyimji kong lir ta asüngdangtsü mapang ka tanü asenoki ajurua lir. Ano, Eastern Nagaland nung alirtemi 'Frontier Nagaland' state magütsüra election nung shilem magitsü ta ashir, anungji iba takhangba atema telangzüba kecha magütsüi kodaser CAPF company paikaya Nagaland-i election duty atema yoker ta-a asenoki asüngdangtsü tim, kechiyong constituency 20 medeni Nagaland Assembly Election agitsüji tamakoktsü.

OLEMSABANG

Tesülen ken meyiba reprangang

~ Mrs.R.Mapukala Pongen, Merangmen Tzürangkong

Ita ana shi süiogo, küm noklang ka sür tenem benjongmong,
Kinük pezü sülen alia arakzüa yimyim ayimba to.
Iba aongmetang ola jagi alima ajak ayimsünga metangoktsü.

Naga nunger rongnung Ao kin yabo palaka.

Ya shir maong ta tetenzük otzü shilua penzüdang nung,
Tamapur ochishir Walunurtem nüktzü ta pushitet.

Asü yim nungi tanü AOR tia ya ngua koma pilemdar na?

Yashi-ang "Arung Yisu kü molungjangi " ta ken aten.

Takar,tulur,sensaker,leni maortema,

Pei yari renemtep, shisa pulu ajak ama-a adok.

Mangoyui aliba adianu,temba tenur ajurua pelatep.

"Idaki na talidak lir" ta tenla ki metangtoka aten.

Tsüngmok amoker medem,yimti yimdong süa jaja.

Iba anogo amato anogo shia lilasang raraba oset kichi nüngdak !

Küm tasen ka yongyaseta ataba,

Tia maka zünger mezüngtet, tipu limai sena luogoni...

Tanü küm tasen ka tongtetbaji Tsüngrem taochi masü no!

"Ni melenshiogo" ta atenba ken jagi tensa palala ajurudang,

Na koma liasü! Jiloshi tamajung sayur ka ama lira,

Tasa tamajung asa-a...alima raksatsür ka na süra,

Oh! Ojang süangma...atakatem tsübuangni...

Aki asen tzürapurtembo tongmelang taküm lia aru.

Tekolak alepbaji par konang naroküm.

Tanü tasen putu joga iba yayim melenshiogo.

Ola matoki tekolok agi raraba putu.

Tasa tamajung agi tangar nem anisadaksüba mapang masü.

Mapang agia shisadanger-ang ola atokba putu.

Mit mesoit-teti jokten-jokrur dangji "alima raksar" ta ajatsü

Tejen putu Israel puri par asoshi Chuba shimdang, raraba oset mamshi.

Parnoki Tsüngrem dang yimsüsür tajung ka kua ta sarasadem.

Tai memenai Ainkar ajanga Chubaji shimtet.

Iyongji alima aser nübor tiptema temoatsü nung pelatep.

Tsüngrem atenba sentong nung teputep aser telongjem lir.

Saka meimchir tashiyim mapa jagi azütokshi ajangzüker.

Tanü Aotzür Aortem ! Arok-aroka masadanger no....

Asen limai Election arur putu aika ibai mapa tasen masü.

Au! Tesüiba putu tim masüba mapa-a inyaker alitsüa südi.

Saka tanübo tangatetba yayim nung asenok jajar.

Alimaibo "AOR" ya petinu rongnunga "Longja petinu" ta ajar süra,

Naga nunger rongnung "mezüngpur" ta ajabaji tetemsü nüngja

Tar nunger otzü, Tsüngen o techanu na jembii medem,

Aori asen ayak shidak mesayutetra,tangar asoshi menüdong asütsü.

Tanü alima tia reprangdangra,lokti onsara.

Kari ayimtener, Clean Election...Clean Election !

Kari ayimtener, sen kua...sen kua ! Telok telok tenteter nongzüteper.

"Clean Election" ta ayimtenertem to, sen meshir telok dena aten.

Kimabo wako songdaka yur temunungratsüka ayipzür.

Election senji temenen ta nüma danga jembir,

Temulungbo palaka...

Asen kilongi Election aya-aka aitar

Sen yong vote teyok!!! Ibai asen senti meyongnem.

Shinga nema tanishidaktsü, nai molungba nem vote agüjang.

Prangpong,injang agi Chuba shimtsü menüngdak.

Tsüngrem,nai molungba imsüsürji shiba ta asüngdangang.

Tashiyim amshia shimra azükaru masütsü.

Arung! Aotzür,Aortem, Yisu yimsü agizüker küm 150 nüngtem nung.

ALIMA ASOSHI MAPA TAJUNG INYAKTI ta ayimdenti....

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor aser kaket zülur Jack W. Hayford alima nungi pilaogo



Pastor Jack W. Hayford aser pa kinungtsü, Valerie na noksa nung angur.

January 10, 2023: Pastor, kaket zülur, seminary chancellor aser tekülem aser tetushi osangtajung ken "Majesty" zülua mejemsang, Jack W. Hayford alima nungi pilaogo; pa arrshi küm 88 liasü.

Jack Hayford Ministries-i parnok indang Facebook page ajanga, Hayford Amongnü (January 8, 2023) Los Angeles, California nung par kidang lia süogo, ta metetdaksü.

"Par kibong züngsemtemi ashiba agi, anepdang züngia pa süngjema amouzüka ao. Honibar aonung pa kinungtsü, Valarie den külemi chiyung aser par semchir ka den-a jembir liasü," ta kasa osang ajanga metetdaksü.

"Tanü asenoki mangyimer, ajisiüka Tsüngrem yimli nung adentsü aoba atema pelar. Tenzüker tajung aser tamanger

ka; pai kodak nung tekülem tajungtiba ajangshidar ta asenoki metet," ta Jack Hayford Ministries-isa metetdaksü.

National Hispanic Christian Leadership Conference nung Tir, Rev. Samuel Rodriguez-i facebook post ka ajanga, "Ni pa (Hayford) dang tembar, ta ajatsüsa maongka angu. Pai mapang ajak nung tanela temeshi atema takdang lapokjang ta ni ajungshia liasü," ta lemsatap.

Hayford ya 1934 küm Los Angeles, California nung aso. Pai lanuwa polio agi mejungi shirang saka anepbaji pa pastor akümtsü atema liasü, ta ashi.

1997 küm Hayford-i yarisema The King's University & Seminary tenteta liasü aser yangji chancellor

inyak. Paisa Van Nuys, California nung The Church On The Way tenteta pastor mapang talangka inyak aser 2004 küm nungi 2009 küm tashi The Foursquare Church nung Tir inyaka liasü.

Hayford-i kaket aika aika zülü aser ken noklang aika mejem aser pai mejemba ken "Majesty" kanga nungtugu aküm. Iba ken ya 1978 küm sayaa liasü.

1977 küm pa kinungtsü, Anna tenati UK semdangba mapang nung "Majesty" ken zülutsü pa ajungmesoa liasü, ta pai ashi.

2017 küm Hayford kinungtsü, Anna pancreatic cancer agi asü.

Hayford-i tanabuba kinungtsü, Valerie den tanur pezü, semchir 11 aser tanaben semchir aika toktsür pilar.

2023 küm Asia nung Khristantem ano tamajungba reshikangshitsü: RI

January 10, 2023: China densema Asia nung aliba linük tenet nung Khristantem reshikangshiba ano taküm tamajungba akümtsü, aser ibaji yimtenren tsütsü nungi aser yimsü alia amangba ajanga asütsü, ta UK nung aliba Khristan temeden atema inyakba telok Release International (RI)-i metetdaksü.

Release International indang report "Persecution Trends 2023" ya December 28, 2022 nü saya aser iba report nung Asia nung Khristantem reshikangshiba linük tenetji- China, North Korea, India, Pakistan, Afghanistan, Malaysia aser Iran lir, ta January 04, 2023 nü Radio Free Asia (RFA)-i metetdaksü.

RI report nung China Tir, Xi Jinping-i Khristantemji linük meimertem masü ta züngshia Khristantem anema inyaker, ta shia lir. "Xi Jinping kübok sorkari ajak azüokner, aser tang tashi nungbo sorkari Khristan yimsü ambangyima azüoka mali. Tsüngrem dak mamangba communist linük

atema Khristan yimsü ya tagizüktefta masü," ta report nung shia lir.

Kasa report nung China nung Khristan lenirtem aser Khristantem apuba aser China nung parnok mission mapa atema asüngdangyaba metetdakja lir.

China sorkari lanurtem, tesayurtem aser tsüraburtem dang, "yimsü ajanga shisaliok raksatsütsü" ta shia yimsü dak sendakba mapa inyakba osang report asütsü ajungshir.

Ano China kidanger North Korea ya tanü alima nung Khristantem reshikangshiba linük tamajungtiba lir, ta Public Affairs Officer, Release International, Andrew Boyd-i ashi.

North Korea nung Kim Jong-un-i, Khristan yimsü ya tanga linüktem atsünga agitsü atema anüolen aliba linüktemi hadir ka ama amshia liasü, ta shia Khristan lenirtem, missionary tem aser Laishiba nokdang.

India nung Hindu yimsü alia amangba telok balalai Khristantem anema inyaker; linük nung right-wing Hindu

Government aliba ajanga item telok tasü itshir inyaker, ta RI report nung shia lir.

2014 küm BJP sorkar aruba sülen nungi Hindu nationalist teloktemi Khristan missionary tem anema inyakba kanga bulua kümogo, ta RI report ajanga metetdaksü.

Pakistan nung mapang shia Khristantem amaker; Tsüngrem mezüngmeshiba ozüng kübok Khristantem nem tai tonglokja apur; Khristantem kangshia Islam yimsü dangi meyipdaksür, Tenla kitem aser leperitem raksatsür, ta RI-i metetdaksü.

Malaysia aser Iran ama Muslim nung nütüung teimba aliba linüktem nunga Khristantem tenokdangba balala ajangshir aser reshikangshir, ta RI-i metetdaksü.

"Tesüiba küm ishika tsüngda Khristantem reshikangshiba kanga bulua kümogo. 2023 küm nung Khristantem reshikangshiba ano tamajungba dang akümtsü," ta Release International CEO, Paul Robinson-i metetdaksü.

ANO GO ABEN TSÜNGREM DEN

Tongpangtem Rarar T.Ken 60: 1-12

Tebilemstü ka bentetli, ano ka tenzükli ta maneni aor. Dawidi iba züluba mapang pa taküm nunga iba tebilemstü lia zülü. Pa tongpang kati aor aser ka asoshi sarasadem. Ne tongpang rara nung Dawidi iba ken nung telangzüba pezü agütsüba amai anidakang.

Mezüngbuba, pai taji ladang (t.1-3). Dawidi teti taji sangro zülur tenük ajanga ladang. Pai tia noksaji ajungben tzümetsüng, menoknok aser yi agi meseper alir nübür den medemdanga zülü. Moab nung alinük amakbaji Tsüngremi nokdangtsü ta Dawidi bilem, saka pai parnok arutsü mela. Idangji Dawidi Kibuba dang tai atoktsü mepishi aser tzümetsüng nungi nübürtem anendaktsütsü mepishi. Yihuda nungeri tenemtem aser alimaji akanga lir ta bilem, saka Dawidi alima ajak anakshir aser jaksaa aor ta bilem. Pai nübürtemji yi agi meseper mangazüteper ama angu. Ain adoka obendangba marok, arua lir. Dawidi taji ladang aser ashi, "Mapatemji tamajungba arutsü asü?"

Tanabuba, pai Tsüngremer ochiba nisanji atsüket (t.4,5). Dawidi iba tongpang rara kechiaser pa Tsüngremer chuba aser nübürtemji Tsüngremer nübür liasü. Asenok taküm nung tongpang rara liaka, aser tatsütep aser tetoktep liaka Tsüngremi maneni asenok meimer ta asenoki bilemtettsüla (Rom 8:35). Pa temeim melenshitsü makok aser tamakok malutsü, asenoki kechi bilemer kecha masü. Dawidi Tsüngremer ochiba nisan ajungket.

Ibaji Tsüngrem tenüngtem rong nung ka lir: "Kibuba kü Nisan lir" (Anitet 17:15). Dawidi koka dang liasü, saka pai Tsüngrem teka tachichi nung nendaka. Kibubai Pa sepoytemi Pa nisan meketa jaten.

Tasembuba, pai tanishir dang anga (t.6-8). Dawidi paji tanabuba tanishir ta meteta liasü, kechiaser, Israel army nung Tsüngremji Walunisang liasü. Tsüngremi ashi, "Israel nung na kongisa odir, ajakji kü meyong; alimaji Ni agi. Anungji shisa tebulu." Kodang tanishiri yamaji jembiba Dawidi angashi, pai tsübutsü mali ta pai metet. Kibuba takokba nung pa anisüngzük (1Kor. 15:58).

Tatamsa, tamang agi pai apuso (t.9-12). Dawidi ashi, "Ni küsasa dak temulung malemer. Takoksang Tsüngrem teti asenok jakdang aor. Pai asenok nem teyari aser takok agütsür" (T.Ken 118:8).

Shiba tashi nung na aor, Kibuba tashi mesüra ne tashi nung takok mesüra tamakok lemtettsü.

ARE YOU WILLING TO DO SOME SIGNIFICANT MINISTRY BEFORE THE SECOND COMING OF THE LORD JESUS? ARE YOU WILLING TO KNOW THE GREAT GOD'S PLAN IN YOUR PERSONAL LIFE? ARE YOU WILLING TO GROW IN YOUR SPIRITUAL LIFE? ARE YOU STRUGGLING IN YOUR PRAYER LIFE, BIBLE READING? Here is an opportunity to fulfill the GOD'S PLAN BY GROWING IN YOUR SPIRITUAL LIFE.

NAGALAND PRAYER CONFERENCE (IN DIMAPUR)
2023 JANUARY
26, 27, 28
THURSDAY FRIDAY SATURDAY
January 26, 27 (Time: 9 am to 4 pm)
January 28 (Time: 9 am to 1 pm)

PRAYERFULLY CO-HOSTED BY:
WESTERN SUMI BAPTIST AKUKUJHOU KUSHAKUKU LIVINGSTONE FOUNDATION INTERNATIONAL SCHOOL

SPEAKERS
Dr. PAUL DHINAKARAN & FAMILY
and anointed servants of God
Last day for Registration: **16th January 2023**
Messages will be in ENGLISH, NAGAMESE and HINDI

REGISTRATION AMOUNT **RS. 1000/-** (INCLUDES DELEGATE KIT & LUNCH/TEA)
* Clean DORMITORY Type accommodation can be arranged with Breakfast & Dinner for additional charges of Rs. 1000/- (for 3 days only). Limited no. of beds only available, on first come-first served basis.

REGISTRATION FORM
Name: Mr/Mrs/Ms..... Age / DOB
Address:.....
Pincode:..... E-mail Id:.....
Mobile:..... Whatsapp:.....
Education:..... Occupation:.....
Church affiliation:.....
Are you a Jesus Calls Partner?..... If yes, Donor Code:.....

For further details: 93609 04051 / 90030 25243

AO OSHI ANGAZÜKDAK: TANÜ ANGAZÜKTSÜBA OJANG



Ongmeta

(n) tetsüంగా mapang, tomta (time in between, not useful time)

* Ni anepdang yakta mesakba agi mapai aotsü ongmeta aküm.

Ongpi

(v) tetsüంగా talang, anameta masü (far distance)

* Onok alu lenmang ongpi orr lir.

OLONG PAITEP # 6396

15x15 crossword grid with numbers 1-16 indicating starting points for words.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüంగా tajemtdak - (6)
12. _ _ _ _ adenshi - (4)
14. Tsünüsenbongsü adokdak - (3)

OLONG PAITEP # 6395 TELANGZÜBA


TIPIEN :

- 1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem,
25. Süra.

LANGTSÜNGLEN :

- 1. Khu, 2. Süjak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü,
23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüంగా, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüంగా :
2. Tasoba anogo:
3. Küm : 4. Class :
5. School :
6. Talidak :
7. Salem osang :

N Biren Singh-i Kangla eastern gate lapoktsüogo



Imphal, January 10, 2023 (Agencies): Union Home Minister Amit Shah-i Manipur semdangdang online ajanga Kangla fort nung eastern gate lapoktsü aser Mongulbarnü chief minister N Biren Singh-i iba ya public atema lapoktsüogo. Kangla fort anüdok tsütsü apu ka Imphal Smart City Limited (ISCL) nungi senotsü teyari agia yanglu. Iba mapa ya Manipur Police Housing

Corporation Limited (MPHC Ltd) inyak, ta Manipur CM-i ashi. Manipur nunger atema Kangla ya putiotsü nung tongtipang tesem rongnung ka lir. 33 A.D. nungi 1891 küm Maharaj Kulachandra tashi iba ya palace aser fortress ka liasü. Kangla aser iba meketa aliba tesem tasazük ya 236.84 acres lir aser 1992 küm Manipur state sorkari "The Manipur Ancient & Historical

Monument & Archeological Sites & Remains Act 1976" nung ajemdaker 'protected monument' aküm.

"Iba eastern gate ya India Reserved Battalion personnel ajanga anüksü aser western gate shibangtsü. Eastern gate anasa aliba tesem ya tajungba kuma yanglutsü" ta Biren Singh-i ashi.

January 6 nü Union Home Minister Amit Shah-i state semdangdang mapatong 21 lapoktsü rongnung eastern gate ya ka lir.

"Prime Minister Narendra Modi-i Manipur ama state tila ka atema süoki ia bilemtsüba aser ajitetba ya konang lir" ta CM Biren-isa Nongpok Thong lapoktsüdag ashi.

Iba sentong nung Rajya Sabha MP Maharaja Leishemba Sanajaoba, Cabinet Minister tem, MLA tem, ketdangsurtem aser nübertem aden.

Supreme Court-i February 14 nü NRC dak sendakba ken o ajak angatsü

Guwahati, January 10, 2023 (Agencies): Supreme Court nung züngsem pungu agi akümba Constitution bench kati February 14 nü National Register of Citizens (NRC) dak sendakba ken o ajak angadangtsü lemtetogo. January 10 nü SC-i NRC dak sendakba ken o tem angadangdang iba ya lemtet. SC-i National Register of Citizens dak sendakba ken o

ajak bendentsü atema tetuyuba agütsü. Taoba mapang Supreme Court-isa NRC nung tenüంగా zülutsü atema maparen ka renemtsü lemtet. Assam Accord pusema 1985 küm Citizenship Act nung Section 6A bendenlok aser iba anema Supreme Court nung ken o tem benoka lir. Iba arlla ajanga January 1, 1966 sülen aser March 25, 1971

matongdang teshimtet tesem kar nungi Assam-i arurtem Section 18 kübok senso ama züngoktsü lateta lir.

Iba ajanga Bangladesh nungi arurtem nem senso agütsütsü atema anogoji March 25, 1971 lir.

Assam nung National Register of Citizens atema petition benokertemi 1951 küm amshitsü aser Section 6A agientsü mepishir.

Assam CM-i Guwahati nung Jio True 5G services tenzüktsü

Guwahati, January 10, 2023 (Agencies): Assam Chief Minister Himanta Biswa Sarma-i Mongulbarnü Guwahati nung Jio True 5G services lapoktsüogo.

metetdaksü. "Ni Guwahati nung Jio indang True 5G services tenzüktsüba atema pelar. True 5G ajanga Assam ajungalen health infrastructure nung tajangzük angutsü imlar. Tanü sayuba 'Clinic in the bag' ajanga grassroots health workers aser Asha workers ajangzüktsü" ta Chief Minister Himanta Biswa Sarma-i ashi.

enoksemogo. Iba ajanga parnoki Assam renloktsü atema bendanga agütsüba sayur. December 2023 tashi nung state ajungalen Jio True 5G services angutsü" ya Sarma-isa shisem.

True 5G services den külemi Jio-isa Maa Kamakhya Temple complex nung True 5G-Powered Wi-Fi services lapoktsü.

"Ozü sorkari Assam nung 5G services tenzüktsü nükjidong lir. 5G-based health solutions mapa tenzükba ajanga Prime Minister Modi'er Ayushman Bharat Digital Mission alizüంగా atongtsü" ta pai ashi.

"Maa Kamakhya indang temoatsü agia onoki tanü Jio True 5G technology ajanga Assam aser NorthEast ajangzüktsü indang sayuogo" ta Jio otongdari ashi.

Iba sentong nung Jio-i Jio Community Clinic medical kit aser AR-VR device, Jio Glass nunger sayu.

"Jio-i Rs 9,500 crore endoka mapa inyakogo aser ano Assam nung 5G network mapa inyaksü atema Rs 2,500 crore

5G tenzükba ajanga onoki Kamakhya temple nung True 5G powered Wi-Fi angati agütsütsü, ta paisa ashi.

"Assam sorkari state digitize asüba nung yaritepba atema pelar. Healthcare Jio True 5G dak alia agriculture aser education amala wadang balala nung tajangzük angutsü" ta Jio otongdarisa metetdaksü.

Imphal nung bomb tesashi ka apok

Imphal, January 10, 2023 (Agencies): January 9 aonung 11.48 ako meta Nagamapal Kangjabi Leirak Imphal Police Station nung bomb tesashi ka apok.

West Police telok ka tesem tonga ao aser forensic experts-i bushisüngdang.

kanga mejungi yirutsü.

Mejangjatetba nisung kari Doren Leikangbam'er kima nung bomb pokdaksü ta osang angazüker. Ajisüaka parnoki kechi atema bomb pokdaksü'ar memetet.

Iba tesem nung alirtemi bomb pokdaksüba maparen khukhua aitsüba metetdaksüogo.

Iba lendong atalokli la Tezpur Medical College Hospital (TMCH)-i anir ao aser idak nung jagi Guwahati Medical College and Hospital (GMCH)-i anir ogo.

Iba tatalokba sülen Imphal

January 5 nü Assam kübok Sonitpur district nunga bomb ka apokdang tetsür ka teka abelen pokdok.

"Tetsürlaji kidangi aodang lenmang nung detonator yuja aliba angu aser lai ibaji shia arudang bomb apok" ta Sonitpur superintendent of police (SP) Sushanta Biswa Sarma-i ashi.

TEMEIM OBALA MATSUNG PONGENER SÜR KÜM 10 AJUNGER



Tasüba agi ajak melenshitsu, Mapangi masü... Nü den onok aliba anogotem nung, Nü menürem, o tanük, nü shisataka tesayuba, pelashishi Olen aser nü taküm otsü ajak to tanü onoki kanga menungra bilenteter. Atangji, temeim mapa bilemtettsüba süngkümba kodanga meshibanger, Idakji onoki tesünep bushir; Kotak nung asenok majurutep tashi, Na teti onok mulungjang nung lir .

- Temeim kinungtsü, Chirnurtem, Anükapang aser Semchirtem.

04:04:1932 - 11:01:2013

MATSUNG PONGENER TAKÜM OTSÜ TATSÜKA

Arishinganger jabaso Matsung Pongener Chuchuyimlang nung April 4,1932 küm aso. Tebu (father) tazünger rongnung tamabur liasü shibai tang aliba Government Middle School Chuchuyimlang 1938 küm tenzük. Matsung Pongener kaket azüngtsü jangraba (avid reader) taküm ka, shikari (hunting), asaya palala (games and sports), aienlen senzüba (travelling) aser yimsü (religious activities) nung takang taküm liasü.

Pa matriculation Mowkhar Christian High School Shillong nung renem, Intermediate (12th) Scottish Church College Calcutta aser Graduation BMC College Shimla nungi asü. Pa diploma / training courses item agia renem.

- 1. Industrial Management Training SIET Hyderabad 1964.
- 2. Planning and Project Implementation Indian Institute of Management Bangalore 1976.
- 3. Industrial Management Training Japan 1985.

Pa Government mapai 1964 küm Inspector of Industries süa tenzük aser 1982 küm Director of Industries and Commerce menden atong aser February 1993 küm mapa nungi anisüngzük angu. Pa North East Purchase Advisory Board Calcutta nunga member liasü.

Pa Government mapa inyaka külemi arogo aser social mapa repa yamai inyak.

- 1. Deacon Kohima Ao Baptist Arogo (KABA), küm 7.
- 2. Kimen (Treasurer) Kohima Ao Baptist Arogo, küm 25
- 3. Kimen Aoli Pongen, Kohima Unit, küm 27.
- 4. Kimen Langpangkong Union Kohima, küm 12.
- 5. Kimen, Chuchuyimlang Union Kohima, küm 10.
- 6. Kimen, Kikumsungba Aso Kohima. Tasünü tashi.
- 7. I. E. F. Kohima Unit nunga member ka liasü.

Pa 11th January 2013 küm akümüli wadang temer ao.

MOLUNGNEN O



Asür Imkongwapang Walling, Lirmen. Aso : 13th Oct, 1987 ~ Asü: 04th Jan, 2023

Asür Imkongwapang Walling akümüli wadang tembanger iba lima toktsür aoba mapang shirnokisa onok asoshi aria bilema temeim mapa sayuogo nenok ajak dang kanga pelaba lemsateper. Pa temang ali nem bendanga agütsüba mapang tashi shirokisa nübu, rongsen aser shisatsü agi onok nongita yariogo, nenok ajak dang kanga pelar. Nenoki teyari agütsüba ajanga onok khuret tepongbaba kümdaktsüogo. Nenok ajak dang mejeta tepelaba melemsateptettsü asünung iba osang ajanga onok mulung ajak agi nenok dang pelaba lemsatepba agizükangma aser tulusang Tsüngremi nenok tali moajang, ta onok sarasadem.

- TemeimTsürapur, Adianu aser Kinungertem

"Onoki pa kanga meimogo saka Tsüngremi pa tali meimogo"

BRIDGES EDUCATIONAL FOUNDATION (BEF)

Building Better Lives Registered under: GOVERNMENT OF INDIA MINISTRY OF CORPORATE AFFAIRS CIN: U80901NL2022NPL013625

BEF is an NGO committed towards social service to empower Education, Health Care, Hospitality and Travel/tourism in Northeast India. As a pilot mission, BEF has established its base in Mokochung District, Nagaland to enhance the Education System of the rural and semi-urban communities.

BEF believes and act on the core values of "LIFELONG SUSTAINANCE WITH LOCAL IMPACT" which provides a platform to all sections of the society without any gender or castes differences to harness local skills and resources and uplift the lives of each households of the community. This is a lifetime commitment with a long term investment to ensure tangible results and accomplishment of its vision and provide a lifelong secured tenure to all its employees.

There is a need of such educated manpower who would be trained to work as mentors, counsellors, teachers, accountants, fitness guides, project managers on a long term basis in any existing entity the foundation chooses. A simple Employability Screening form can be filled by any interested candidate through the link https://bit.ly/BEF2023 in the limited period of application from 10th Jan. to 24th Jan 2023.

Who can apply ?

- 1. Any one above 21 years and below 45 years of age.
- 2. Should hold a graduate degree of any stream.



January 10, 2023 : Indonesia kübok Aceh province nung Lamnga tzüküm tonga aruba sülen Rohingya nung refugee tem jajayonga aoba noksa nung angur. Rohingya Muslims nung telok ka sung agi yangluba rong ka nung mener Indonesia kübok Aceh province tonga ao. Parnok ajak agi nisung 185 Indonesia tongaogo. Taoba küm Bangladesh kübok camp tem nungi refugee noklang aika Indonesia-iogo. Rohingya nung refugee million ka shi Bangladesh nung lidar. Myanmar nung military-i parnok tepsettsü merangba sülen parnok jenshia ao.

DR Congo nungi refugee tem magizüktsü: Rwanda

Kigali, Aenjeti/January 10 (Agencies): Democratic Republic of the Congo (DRC) nung mepetmesü tulu adoker aliba nungi jena aoertem nem Rwanda-i tejenokdak ojang dang agütsütsü ta shiogo aser iba ajanga Africa nung kidanger linük ana tsüngda tesendaktep mejungi aliba tali tamajungba kümdaktsüogo.

Democratic Republic of the Congo anütoklen sepaitem aser M23 telungpur tsüngda tanen makai raraba ajanga nüburtem tali mejungi kümogo.

M23 nem teyari agütsüba atema DRC den külemi United States aser Europe nung linük aikati Rawanda aiben aija arudar, ajisüaka Kigali-i iba taitsüba ya magizüker aser parnoki telungpurtem nem teyari magütsür ta shia arudar.

"DR Congo nungi refugee

tem nem maneni tejenokdak magütsütettsü," ta tir Paul Kagame-i linük yimtiba Kigali nung parliament nung upper house dang Hombarnü ashi. "Iba ya Rwanda tebilemtsü masü aser iba ya Rwanda tebilemtsü masü ta ajak nem angatetdaktsütsü," ta paisa ashi.

"Rwanda-i iba khuret ya abentsü atema ni memulunger," ta tir-i ashi.

Telungpur aser sorkar na tsüngda raraba ajanga tensa kanga mejungi kümogo aser Rwanda densema kidanger linüktemi nisung meyirejang aika jenaogo.

November ita UN sangdong ka ajanga ashiba agi, Congolese refugees 72,000 shi Rwanda-i iogo.

Iba mepetmesü adokdaktsüba atema Kigali-i

Kinshasa aiben aitsüogo aser DRC-i, Democratic Forces for the Liberation of Rwanda (FDLR) pusemba mango ama toktsüba atema alima kintem aitsüogo. FDLR ya Rwandan Hutu rebel movement ka lir koba 1994 küm genocide sülen tenzükba lir.

DRC-i iba mepetmesü ya yimden yimsüsüba nung ajangzüktsü atema amshiba aser November ita civilian 131 tepsetba mimbangtsü atema amshiba atema Rwanda-i parnok aitsüogo. November ita civilian aika tepsetba ya UN-i M23 telungpurtem dak tai tongloktüsügo.

Ceasefire benokba aser East African Community (EAC) ajanga Kenya nung sepaitem yokba ajanga-a DRC nung azütokshi menokdangteti arudar.



January 10, 2023: Brazil yimtiba nung taoba tir Jair Bolsonaro pusemertemi sorkar office tongtibangtem amakba sülen anogo ka lir linük nung democracy kümzüka ayutsü atema khanga longkak aitba mapang longkak aitertemi Portuguese oshi agi "We are Democracy" ta züluba banner ka bener yimtongsüa senzüba noksa nung angur. Taoba tir Jair Bolsonaro pusemertemi Deobarnü Congress, Supreme Court aser presidential palace maka liasü. Parnok aikati Brazil army nem Jair Bolsonaro tanaben meyipa anir arudaktsüner aser kasa mapang nung tir Luiz Inácio Lula da Silva mapa nungi agindaktsüner.

MLA & Advisor Imnatiba-i 33 buba LKM saisapong sentong tenzüksüogö



Advisor Imnatiba-i 33 buba Langpangkong Kaketshir Mungdang (LKM) saisapong sentong tenzüksüodang tangokba noksa nung angur. Chuchuyimlang, 10th January, 2023.

Chuchuyimlang, Aenjeti/ January 10 (TYO): MLA & Advisor for Industries & Commerce, Labour & Employment, Skill Development & Entrepreneurship Govt. of Nagaland, Imnatiba-i, 33 buba Saisapong sentong Jan 10, 2023 nü Chuchuyimlang play ground nung meraketa tenzüksüogö.

Pai iba sentong nung jembidang, saisapongba ya luyim tulu ka kümogö, anungji, mapang intoktsü atema masü temang anema alitsü aser pei taküm nung teti atema mapa ka kümduksütsü mangdang yur asayatsü ayongzüka liasü.

State sprkari saisapong ajungkettsü asoshi mapatong kar tenzüksü indang lemsatepdang, Nagaland

Olympic & Paralympic Games tenzüksü, South Asian Cross Country Championships ayongzüksü, aser North East Olympic Games 2022 Meghalaya nung akadang Nagaland nungi nisung 70 dak temai medal bener aru. Yamaji sorkari mapatong balala tenzüksü saisapong nung temulung agütsüdaki, anungji, item nungji asen district nungia koba tashi shilem agidar, ta paisa asüngdanga ashi.

Sorkari saisapong luyim tsütsü maangka aika lapokja arudar aser Naga nung dak saisapong tsütsü sempet jenti keta lir, anungji, lanurtemi temang raksaba chiyungtsütem nungi pila-a alitsü nangzüksüla aser mangdang tejangja yur

meranga asayatsü asoshi ajungshia liasü. Iba sentong akaba ajanga yimjung, telungjem aser saisapong tsütsü langka tajung karbo adoktsü imlar, ta paisa shisem.

Iba sentong nung Chang Students' Conference tir - Pongsu, Langpangkong Senso Telongjem Mokochung tir - Imlimatsung, Chuchuyimlang Rionsanger Putu Menden yimsüsür - Tsükjemtangit Tatar, Langpangkong Kaketshir Mungdang tir - Washimong Sadem Longkumer, LKM Saisapong Zülur - Kilangnukshi Imsong, taoba LKM tir - Imnakika parnoki shilem balala agia liasü. Iba saisapong sentong ya Jan 13 tashi asaya-a amungtsü.

Sekrüzu Area Sports Association (SASA) asayamung tembangogö

Kohima, Aenjeti/January 10 (TYO): Sekrüzu Area Sports Association (SASA) 39buba Sports Meet aser 2buba Naga Wrestling Championship 2023 Mongolbarnü Phek district kübok Sekrüzu HQ nung tembangogö. Iba asayamung ya "Fraternity Towards Progress" omen nung ajemdaker agia liasü.

SASA kübok jila ka densema yimtsüng ti; Dzülha, Thürütsüswu, Khütsa, Phühgi, Rüzazho, New Rüzazho, Suthozu Old, Suthozu New aser Sekrüzu Town nungi asayartemi iba asayamung nung shilem agia liasü. Iba asayamung ya Phühgi Youth Welfare Union-i ayongzüka asayaogö.

Tebur football asaya final nung Thürütsüswü yimtsüngi goal 1 agi Khütsa madak takok ngua liasü. Asaya nung Thürütsüswü atema goal ka ya Bizoto Swüro-i asaya mezüngbuba shilem nung idakja liasü.

Asayamung shibangba sentong nung Nagaland Wushu

tir Küdecho Khamo alakteta jaoker liasü. Sentong nung o jembiba mapang Khamo-i asayartem dang asaya nung takok ngua aotsü atema yimya yimpong shidak bentshü aser bendanga agüja asayatsü ajungshi. Taoba küm asayaba Northeast Olympics nung medal angurtem ya timba kija asaya nung liasü ta shia pai sentepa aliba lokti dang maneni takok tajung ngua aotsü atema asaya ka dak dang rangloker asayatsü ayongzüka liasü. Paisa, pei dak aketba sempet tajungtiba agi amshiba ajanga tarutsü nung takok tajung angutsü ta ashi.

Maneni pai, asayamung kanga takok ngua ayongzüka asayaba atema asayamung ayongertem nem tenüngsang agütsü. Paisa, asayartemi asayar yimya tajungtiba bentshia asayaba atema tenüngsang agütsü aser takok angurtem dang taruba PDSA asayamung nung SASA tenüng nungi asayatsü ajungshia liasü. Khamo-i asayartem tali professional süa asayatsü

atema archery nung national aser international asayar Cekrovolü Swüro tatishitsü amshia jembia.

State sorkari saisapong ajungkettsü atema bendanga agütsü lir ta shia pai, pa lenisüba nung NOA-i state jenjang nung asayartem nem maangka aika agütsüogö aser Northeast Olympics nung medal angurtem nem senpet dena agütsüogö, ta ashi.

Asaya balala ya profession ka ama kümduksütsü atema pai asayartem dang asayamung mapang tang masayai tarutsü atema bilema asayatsü ajungshi. Paisa, lanurtem dang parnok indang career nung kechi ajangzüksüner iba atema telemtetba agütsü tang mapang lir ta ashi.

Asayamung shibangba sentong ya General Secy. SASA Veduto Swüro lenisüba nung agi aser Lühkoto Nienu-ken ka tena liasü. Sentong nungsa Finance Secretary SASA Cekrolhü Sapu-i tepela anküp o jembia liasü.

Zhaleo-i Wrestling asayamung nung alakteta jaoker amashilem agi

Dimapur, Aenjeti/January 10 (TYO): Chakhroma Youth Organisation Group-C Wrestling aser Volleyball asayamung tenzüksü sentong nung Advisor, Sericulture, Excise & Minority Affairs, Nagaland Zhaleo Rio, IAS (Retd.) alakteta jaoker liasü. Iba asayamung ya January 10 nü Medziphema 'A' yimtsüng nung tenzüksüogö aser January 11 nü tembangtsü. Group C nung yimtsü 5 densema lir.

Asayamung lapokba sentong nung Zhaleo-i, saisapong koda tongtibang aser takok angutsü atema temulungtetba tulu alitsü aser ajak longjemer inyaksü nungdakba lemsatepba liasü.

Paisa, asayartem dang asaya ka shimtsü aser bendanga agüja inyaksü ajunshiba den yimya yimpong azüoka inyaksangshiba, temang anepaluba aser training shidak agiba ajanga asayar ka

career nung tongtibang shilem agir ta ashi.

"Saisapong ya profession ka lir aser asayar kati takok tajung nguteta asayara taküm jenjang tajungba küma melenshia aotsü atema lenmang sadema lapoka lir," ta pai ashi. Rio-isa, tsürapur aser yimtsüyimbo temdang lanurtem saisapong nung shilem agütsü atema ajungshitsü ayongzüksü. Maneni pai, "lanurtemi tamakok agizüktetsü asoshi anagzüksüla aser aibelen nungi angazüksü nungdaker, kechiyong takoker ka akümsü atema iba ya kanga tongtibang," ta ashi.

Iba asayamung lapokba sentong ya Rokozhakho Kruse lenisüba nung agi aser taoba Medziphema 'A' Baptist Church pastor Kelhoutshevi Kehie-i Tsüngrem temaotsü meshizüka sarasadem. Sentong nungsa Sitso Terhüja-i lokti pela agizüksü o jembia liasü.

Brook & Gardner na nem ICC Players of the Month naroküm agütsü



Dubai, Aenjeti/January 10 (Agencies): Harry Brook-i tang mezüngbuba ICC Men's Player of the Month naroküm agizükogö. England team-i Pakistan nung World Test Championship (WTC) series ka akokba nung teyari tulu agütsüba sülen pai Mongolbarnü iba naroküm agizükogö liasü.

Kasa mapang nung tetsürtem rongnungi ICC Women's Player of the Month naroküm ya Australia tsür Ashleigh Gardner nem agütsüogö. India nung T20I asayaba mapang batting aser bowling naprongla nung kanga junga shilem agia lar team takokdangi aniba den Player Rankings nung all-rounder tem rongnungi temaba jenjang atuba sülen lai iba naroküm agizükogö.

Media representatives, ICC Hall of Famer tem, taoba mapang international asayartem aser icc-cricket.com nung

züngoksema aliba fan temi vote agütsüba sülen tenati iba naroküm agizükogö liasü.

England team-i Pakistan akokba asayamung nung Brook nokdangtsü asoshi tasak liasü aser pai asaya ajak nung century kaka züka liasü. Iba asayamung ya England-i 3-0 agi koka liasü.

Pakistan den masaya tsüngda Test ka dang asayar liaka Brook-i kanga junga asayaogö. Pa Rawalpindi nung mezüng asaya-a tenzüksü aser iba asaya mezüngbuba innings nung pai run 153 yanglu aser tanabuba innings nung run 87 yanglu liasü. Iba sülen pai Multan nung run 108 aser Karachi nung run 111 yanglu liasü.

Australia tsür rongnungi all-rounder Gardner-ia tang mezüngbuba Player of the Month naroküm agizükogö.

December ita India den asayaba mapang lai run 115 yanglu aser iba den wicket tenet agi 2022 küm kanga junga asayar tembanga liasü.

BILEMDANGANG

"Nai tangar sempaba ajanga nü senti mapang aika amajok nung lalur."